

四庫全書

集部

欽定四庫全書

集部

伊濱集卷三

詳校官庶吉士臣初喬齡

侍讀臣孫球覆勘

謄錄副貢生臣杭光晉

欽定四庫全書

集部五

提要

別集類四元

伊濱集二十四卷

臣等謹案伊濱集二十四卷元王沂撰沂字思魯先世雲中人徙于真定父元父官至承事郎監黃池稅務馬祖常石田集有所作元父墓碣銘叙其家世甚詳而沂始末不槩見今以集中所自述與他書參考之尚可得其

大略據馬祖常碣銘稱與沂同榜則當為延祐初進士據集中送李縣令序則嘗為臨淮縣尹據義應侯廟記稱延祐四年佐郡伊陽考地理志伊陽在嵩州則嘗為嵩州同知又詩中有綸巾羽服卧伊濱之句則集名伊濱亦即起于此時據祀南鎮北嶽諸記則至順三年嘗為國史院編修官據送翟生序及胡節母詩序諸篇則元統三年嘗在國子學為

博士據送余闕序稱元統初佐考試見闕對
策云云則嘗入試院同考而余闕實為所得
士據祀西鎮記御書跋諸篇則至元六年嘗
為翰林待制並嘗待詔宣文閣又宋遼金三
史成于至正五年而書前列諸臣修史有總
裁官中大夫禮部尚書王沂之名則是時已
位至列卿其後遷轉遂不可考疑即致仕以
去然集中壬寅紀異詩有壬寅仲春天雨電

南平城中畫驚愕自從兵革十年來
瀕洞風塵亘沙漠之句又鄰寇逼境倉皇南渡詩有
隣邑舉烽燧長驅寇南平中宵始聞警挈家
遂遠行之句又有寓吉林塘避桃林兵警詩
壬寅為至正二十二年正中原盜起之時距
沂登第已五十載尚轉側兵戈間計其年亦
當過七十矣沂歷躋館閣多居文字之職廟
堂著作多出其手與傳若金許有壬周伯琦

陳旅等俱相唱和故所作詩文春容和雅猶
有先正軌度惜其名不甚著集亦絕少流傳
選元詩者并不能舉其名氏今從永樂大典
中裒掇編次釐為二十四卷庶梗概尚具不
致遂就湮沒焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

伊濱集卷一

元 王沂 撰

賦

函谷關賦

客有遠適於西土兮聊游盤乎關東窺河流之奔放兮
眄高掌之遺蹤行平臯之如席兮豁函谷之鏗鏘觀天
險之固護兮據五達而隆崇迺喟然而嘆曰遐乎邈然
姬德之衰也有真人焉致虛克極兮守靜曰篤遊物之

初兮而立於獨綴明月以為佩兮製青霞而為服厭中
區之溷濁兮竭遠遊以觀復乘素蜺之脩幡兮綵雲蓋
而虹旗駟青虬之連卷兮先雲浮之陸離裔狂奔而警
蹕兮走招搖與黔雷焱騰踊而奮颯兮曳光耀之歲蕤
詔陵陽以疾驅兮吾將往乎南娛巨靈下襲而奔突兮
颺紫氣之逶迤歷函關而弭節兮與尹喜乎相期著微
言之元妙兮垂金薤之瑰奇曰無名天地之始兮有名
萬物之母聽之而不聞兮視之而不覩唯恍唯惚兮以

閱衆甫喜眩然而自失兮微夫子誰發吾之醯雞何天
地之大全兮吾茫洋而不知迺谷神於元牝兮載營魄
而高馳相與過太乙之所居兮歷崑崙之歲魁驅松喬
與偓佺兮役羨門乎三危軼列缺之倒影兮滄沆瀣而
充飢越八紘而竭度兮涉流沙而徘徊風樅樅而扶軼
兮雲來迎而穆纚矍櫨槍與旬始兮格澤歛其揚輝邈
閭闔而謁帝兮帝亦欣然而來祇命西王母以上壽兮
玉女鼓瑟而舞雲師乘虛亡以獨存兮超寥廓而忘歸

悲人寰而下視兮擾羣蟻之紛移伊茲關之形勢兮為
強暴之所恃若乃羸秦虎視列國犬獬開關延敵鳥散
塵沸又若羣雄雲擾漢祖龍驤項羽梟冽縱火擅強烽
燧之勤井幹之固戰馬屯雲猛士如雨既已勢窮力竭
變滅無餘河深華高草生故墟聖朝以四海為家八荒
為居普天所覆咸沾咸濡不烽不吏匪析匪符示王者
之無外廓四會之通途吾將觀紫氣之遙遙俟青牛之
仙車傳清淨之言樹雍熙之輿陋文景之迫隘躡羲軒

之元符

溫泉賦

客有遊於臨汝之山徘徊溫泉之上喟然嘆曰山之有
泉猶人之氣也吹之則寒呵之則溫蓋其性之自然而
無待於外也彼狃于靈砂暮石酷烈之氣惑于燭龍熒
惑潛照之怪蓋昧乎物理之大而囿于耳目之隘然泉
之為湯者在在有之而驪山汝水獨以名著詎以乘輿
後宮之所臨幸歟吾是以嘉斯泉之遇也當其盛時綺

疏璇題玉璫壁英魚龍飛動眩人目睛及其勢徂事變
光沉響息翳之以荒煙古木冒之以澤葵藋刺蘼蓀漁
子之所濯沐木魅山精之所嘯集於是騷人墨客凝思
寂聽登高遠望嘆息成詠以為亡國之遺迹吾又以哀
斯泉之不幸吾嘗歌久視之遺詩想輿衛之雄麗煙霏
靄兮千官風雨忽其萬騎三思之鬼蜮昌宗之狐媚洎
斯泉之流而不足以湔其耻俄而白日西匿獍風振沙
野羽嘯其叢薄寒鷗鳴兮枯槎灌莽杳而無際心慘惻

其無涯吾亦按轡而去恐山川之神笑其言之誇也

放山雞賦

久栖遲於山澤厭羽族之珍奇嘉茲禽之自得固殊智
於羣飛抱耿介之貞性表瑰麗之妍姿煥繡膺兮丹頸
炫披霓之仙衣崎幽閒之容止遠人境之喧卑栖遐深
以是適照滄浪而自怡匪華軒之是乘豈雕籠之能羈
聊優游兮飲啄與憂患兮長辭何巧夫之艱險設雲羅
以見縻旅燕雀而為擄傷羽毛之低摧詎文采之賈禍

將狷潔而殃罹敢微軀之自保全疇侶之睽違適野叟
之見售動余心之長悲始縛布之甚急旋釋儀而縱歸
詎羊公之責報抑簡子之是希無求友而遭賣無啄食
而觸機偶六翮之未鍛聊遠舉而遐嬉嗟微類以喻大
聊抒意而成詩

勤耕堂賦

富州鄒福名堂曰勤耕莆田陳衆仲既銘而福請余不
已乃為之賦曰浮西江以遐逝擇瘠土而歸耕躬劬勞

而不貳庶善心之由萌時輟耒以太息感先民之所程
苟嚮義之或違諒余心之未寧好風東來兮膏雨宵零
升陽潤土兮冰渙川盈嘉植阿那兮羽鳴嚶嚶川原高
卑兮錦機紅青夜飯牛以悲歌晨擁犁而戴星忘胼胝
之作苦幸襁褓之蔽形綿綿秧針衣被清泠苟令置膝
兮武子過庭雖娟秀之可愛卒未知其所成既幽慄乎
早魃又明懼乎螽螟謹歲功之云始分百憂之怵怵寧
飈實葉兮蟋蟀宵鳴渺黃雲之彌望錦捩捩而風生舍

蓋避堂祖疎辭榮顧耒耜之在壁猶盤盂之有銘託陋
質於昭世旅讓耕之遺氓獲同穎之嘉禾數盈虧之階
莫從君子之好脩羌羽儀於上京躬勞瘁以踰紀亦含
芬其吐馨詎桑梓之悠曠愧蒸嘗之弗營惟垂穎而顧
本指南雲而效誠歲冉冉其云暮渺悵悵之余情收疇
昔之逸豫修初服以南征

雪竹軒賦

大梁王希孟榜軒雪竹師魯道人為賦曰江空歲暮僵

立萬木有偉青士強項不屈初秀挺以立玉條錚鏦而
響筑虛室生白若逃空谷押鎮帷以懸犀裘堆膝而裁
鹿擁殘爐而敲帽甘龜手以肥粟清聲遠響條斷還續
起而視之羣仙鶴馭羽衣縞服雲情風肅空曠出沒豈
居家之此君而籀龍之諸族也邪嗚呼噫嘻堅貞則有
立潔白斯無欲虛心所以持身敷澤所以成物豈惟徇
徕以卒歲蓋將繼君子之遐躅

嘯臺賦

阮嗣宗酒酣登臺箕踞甚逸眼空四海神遊八極既騁
望以慷慨乃長嘯而自適聲清厲而彌長音礚礚而絡
繹或徘徊而縈雲或激躍而裂石或遠響之澎湃或餘
哀之剽急雲變色而凝飛鳥悲鳴而舉翼清飈振而若
厲流泉咽而如泣羣聲之至清含自然之鍾律滌埃
壅之溷煩聊超然而獨立忽仙去兮不返遺茲臺之岌
岌嗚呼噫嘻斯人之不可得也士固有大言而欺世虛
名而無實然味言而察其志循名而觀其識則真偽之

分奚啻白黑也當其慟窮途歎廣武豈昏冥之是逃抑
遺世而不顧俾其遘辰得位以奮厥志則將伏南陽之
軌躅馳東山之極摯惜其懷瑾握瑜久幽而不試樂邱
壑之栖遲銜杯酒以自肆貞而不諒遜以傲世過故臺
而一弔動志士之歔歔

望思臺賦

出湖城而西驚兮眺泉鳩於中塗弔漢武之肆暴兮憫
戾園之無辜忽孤墉之如塊兮曰歸來望思之遺墟吁

趙虜之讒賊兮亂迺國猶擄捕武雄畧其馬在今曾不
寤夫覆車初犬臺之召見兮冠步搖而垂輪固將竄巧
以逞志兮帝已湔拭其逃逋知銜毒以肆噬兮寧畏夫
宗滅而身屠間茂陵之猜忌兮實惑神而信巫親文成
而溺五利兮耗生民於怪迂挾蠱道以祝詛兮疑左右
之是圖抑天道之好還兮聊假手乎憐夫彼長平與陽
石兮加顯戮乎其孥探隱伏以或嫌兮詐夜祠以沾濡
瘞桐木於宮闈兮卒嫁禍於帝儲哀淺謀之狂傳兮爰

昔鑒於扶蘇盜父兵以戮充兮冀忿忿之或據獨寃結
以誰語兮將何適而容軀懿三老與千秋兮銷惡運兮
無餘焚橫橋其已晚兮徒興哀於既徂築新宮以永思
兮魂煢煢其焉如緬先王之儲貳兮唯端良之與居峙
博望以延士兮雜衛翼以壬諛哀持身之不謹兮卒失
勢以就誅帝復信謠而嗜殺兮不能慎夫厥初構禍敗
之弗救兮徵蚩尤以為符興余悲於千古兮聊盤桓以
躊躇陟古塹之谿訝兮盼頽基之蓁蕪歌青蠅以一帛

兮遂慷慨以成書

不寐賦

何杪秋之遙夜兮塊獨處兮心怵感歲月之徂邁兮蹇
澶迴而無成悵反側而不寐兮紛所憂其相仍聊披襟
以容與兮聿發憤而揚清澹蒼蒼之天宇兮流孤月之
熒熒橫明河兮素練萬籟寂兮無聲練余心於元妙離
塵垢之營營歌遠遊以激烈兮淦沆瀣之宵零存亭毒
之正靈兮息擾擾之外慕履孔德之寃冥兮超遺俗而

不顧吾以元氣為車兮以微風為御渺遨翔于太清兮
孰云桎梏之未固夫何美人之遙遙兮乘翠雲而容與
哀吾生之孔艱兮淹躊躇而弗能去及行迷之未遠兮
還吾返乎故宇聞至言以斟酌兮幸年歲之未暮稽同
人之先號鑑北叟之後悟聊肆志以從容復何憂而何
懼

看雲賦

為吳間
間作

太虛清明極靈無聲風雨霜露性命咸貞日餘惟星月

邈虧盈昭回在上獨雲多形或魚鱗之錯錯或車蓋之
輶輶泰山崇朝六合同氣目不容瞬條若掣幟已霑漑
乎種稊復覆蔭乎弱穉馬馳輶輶是知朔方氛祲正祥
占臺書常何質無而神有而隱顯鉅細之巨量也元隱
子于是延佇而睇之重歌曰我觀於天雲有物兮輪囷
扶輿生眇忽兮變無化有亦其神兮離有入無反乎真
兮九州百物象其精兮一氣之虛龍或憑兮蒸煇歛霽
油然昭倬又將焉名兮

胡桃木賦

吾廬之陽峙嘉植兮受命於天物莫比兮修幹巍峩鉅
葉旒兮屹如承天中立不倚兮鵠臬不集矧毒螫兮遠
彼邪惡斯明哲兮纍纍佳實薦之珍兮膏以自澤德潤
身兮厥材之良剖犧尊兮不青不黃而自文兮林林天
壤寓奚異兮或斷溝中萬乘器兮使然者誰抑偶置兮
曷若斯木德之備兮明告君子以為類兮

四言古詩

短歌行

南山采樵林木未凋北厓多薪鬱何岌
堯白雲在巔驚風日飄豺虎相逐猿猴可招
長嘯條往睨彼柯條匪材不經中則乃遥
荆棘鉤衣瀑流喧囂還顧舊鄉心旌搖
搖商山採芝巢由避堯絕唱千載清風
寥寥五十負薪行歌車塵彼獨何心我思古人

和溪釣者圖

流泉幽幽釣絲浮浮風濤既遠雲木相繆
方之舟之竹

竿恒持鯨鯢弗顧鯁鯉何為今焉在溪伊昔望海彼美
釣徒志尚千載洪岡之東其誰與同欵乃天際悠然清
風

五言古詩

古詩

一以送克呼景充入梁其二以謝張子
文應舉訪余伊上兼簡汴中諸名勝

山童照伊白日瘦埋雲黃雍容車騎都長卿薄遊梁文
采麗宮錦鄒枚欽其光我飄山林牢三見天雨霜公如
左右手易親復難忘交深出苦語愜於冬飲湯夷門二

三友問我行與藏長吟歸田賦亂以囚山章

桴槎在江湖行止非所期誰云山澤間見此鸞鳳姿人
生會面難肯憚鞍馬疲遙迎長伊湄枯榆媚寒曦親友
話存沒學問訪闕遺醉語雜嘲謔曾不我瑕疵君憐我
踈懶我愛君坦夷而能致斯人孰謂余數奇傾蓋即分
襟歸馬三振鬚仰看孤雲飛搖搖心南馳山寒梅未破
何以寄相思

寒月侵山軒朔吹鳴竹牖夢中逢故人談笑共杯酒怪

我趨塵埃短褐幾露肘相望曉天星相思令人瘦丈夫
屬有念虛名等箕斗曾聞子公書出此釣竿手平生張
平子矯矯文章叟懸知月旦評應憶忘年友

感秋六首

寂寂重寂寂窮巷秋氣集遠家誰晤言披書了今夕斯
文家舊物蚤歲事雕飾橘柚本不遷敢望為羽翼謬蒙
時髦知風雅共推激一從縛卯申坐覺憂患積緬懷下
帷年我自適其適茅屋濕風霜青燈破寥閨蟪蛄懸壞

牖蟋蟀語空壁豈無故林思奈此世故力已矣勿復云
清愁漲胸臆

我愛黃翁材筆力追二班校尉亦已侯老將猶行間憶
昔懷刺遊為翁數解顏譬彼絕壑松蔭此幽谷蘭祕方
不我諱汲深良獨難相思千山表惆悵遙夜闌夢中不
識路月明江水寒

黃子富文章皎皎有仙骨當年牧羊處白石秋草沒相
思欲面論夢想扁舟兀安得啟玄關玉佩聽清越分我

金華雲烹茶對山月

屋角月吐明蛩吟亦知候夢中逢故人談笑共杯酒勿
云千山表默坐能邂逅秋雨老菰蒲澄江明橘柚想見
登臨處驪珠滿衣袖

秋草何青青秋花亦叢叢上有弄芳蝶下有悲吟蛩清
霜日以厲搖落隨西風所寄終不移捐軀以相從惜哉
時不與幽恨何其終

吾愛荆隱君忍窮剛自怒生涯魚乞水文采豹藏霧憶

昔垂兩髦朝夕親杖屨只今皮毛落真實尚如故秋風
欺遠客索索語庭樹何以慰相思長吟不知曙

由竹壩望錦川桃李春色如畫有懷陳邑令

涉淺上輿梁憑高眺鄉縣灼灼桃李花層層遠皆見兵
餘草根盡此地芳菲徧氣暄雉雙雠景淑鶯百轉邑里
齒故繁絃歌俗丕變懷賢思如渴敷政速於傳孰是潘
安仁而猶寔子賤

鼓吹入朝曲

笳鼓觀皇州銀鞍韞紫騮九衢白石靜雙闕彩雲浮介
冑揖上將珮珂趨列侯清光邇廷陞喜色動宸旒脩陳
塞下事起進幄中籌披甲復上馬望京將起樓赤九躍
劒室精彩拂星流萬歲奉明主節旄歸海頭

無倪舟

太虛以為川元氣為我舟傲睨八極表恍如乘桴浮問
津建德國弭棹逍遙邱回首太行路摧輪多悔尤

夜汲

如夢復如醉長夏困炎熱披衣聽琴筑古井來新汲呼
童下兩綆隨我有孤月雪乳泛瓶罌寒光洗肝鬲百年
幾瓢飲所適初不擇寧須好事人記此王粲宅

題李溉之別業紅雲島

曲折藏一邱薦錦千樹桃東風落紅雨點綴宮錦袍春
漲綠未波晴光漾輕舠承明自厭直不是秦人逃

九日同樂大成諸公小集

甘雨不時降浮雲清旦陰賜衣候南極吹帽眺東林陽

烏歛精彩征鴈流遠音為客戀故土還鄉乖宿心蕭條
黃菊徑憔悴碧蘿岑賓御得晚合朋樽勞夕斟涼月照
前席清風吹我衿美人隔千里遑恤故意深灼灼芙蓉
花乃在幽澗潯夜分更相即秉燭調素琴

雞武關

亭亭雞武關盤棧石奮角俯窺井千尺仰視天一握長
林細若髮峭壁立如削兒孫立羣峯蟻垤視嵒壑江流
走其下怒響雷震薄猿猱相戰慄金碧氣參錯東陋鐵

堂峽西卑劍門閣乃知天設險所以嚴擊折遐方減氛
侵行旅若郭郭我生亦何幸長嘯倚寥廓

洪贊曉行

兩山勢環合嵐重路不分須臾上東旭帚掃羣峯雲聯
巒髻鬟擁斷坂綺繡文涼飈從西來禾黍揚清芬野老
倚杖立草蟲鳴相聞悠然故園思欲返麋鹿羣君恩諒
未報華髮徒紛紛

傅夢臣淮漕使遺愛詩

鹽貨重古今淮漕蓋其首出節付羣材詢謀欲經久豈
惟國用足亦欲民生厚官居等傳舍其政固多苟課額
歲以增紛紛誰與守煎戶日困窮吏職又習狃追徵急
星火犴獄常紛紛糾懸鷄不掩脰破甑或無糗窮陰不得
滴往往死鞭杻鄉閭人所懷今也棄而走倒懸而不救
詎為民父母傅公由荷橐選使自朝右下車未云幾剔
蠹什八九清風抑豪梗甘澤活枯朽將更積年弊上疏
明析剖民瘼置不問誰當執其咎蠲蔭十萬額措法貽

厥後吏民總懽躍如釋萬鈞負至今淮甸間歌頌不
容口公今位中書大展經濟手賡歌南風絃坐見人財阜
孰云惠一方海宇躋仁壽

欽定四庫全書

伊濱集卷二

元 王沂 撰

五言古詩

清水驛

東出虎頭關畏途復多雨林端望山驛屋脊翳復吐板
橋馬行翳竹逕禽哢聚江流猶蜀道客子已秦語聯峯
抱高臺鬱鬱多草樹傳聞漢武侯於以駐師旅遺鏃雜
刁斗土花蝕金縷空餘舊營壘隱隱皆可數徘徊想英

風彷彿見眉宇壯圖雖云屈陳誼吾有取

草涼樓驛

鳳州黃花驛山路石齒齒少年躍馬來自云巴省使壘
魂橐中裝蠻獐雜珍賄馬鞍未及解喘息汗如水莫辨
驪與黃塵埃翳瘡痂驛卒相股栗漿水前拜跪須臾驗
館券咄嗟具甘旨持盃未投箸叱吒戟其指前途須駮
足快若雷過耳吏也前致辭民飲食無米小邑無權奇
連槽才百尾使嗔欲裂皆極力加鞭箠以索繫其足以

鞭枯其耳驚呼聚老稚懇告未遽已時我坐堂上顧視
顏有此吾聞一馬值其價千金比豈惟數家產往往鬻
妻子清時法令具恩澤及行葦詎期赤子輩而橫遭毀
恥長歌紀其事以告司風紀

盤龍閣

江流轉山根怒若雷霆鬪兩崖束天窄了不辨昏晝閣
道勢凌虛蜿蜒工結構鑿石駕飛梁俯視明欲透霏煙
撲馬尾空翠冷衣袖江花落我前山鳥啼我後物情豈

不佳一墜那可救整鞍望所歷險絕吾敢又長吟紀壯
遊援筆泚巖溜

秋日道中雜詠三首

釋悶偶出遊時光感流轉晚禾雨中熟秋草沙際軟延
賞遂永懷緣竒遽忘遠田翁候門久籬落吠山犬

采樵南山顛往來清澗曲地磽材木尠世亂斤斧數所
以澗畔人清風一竿竹超超出塵網朝暮恒自足

高舟上灘遲厚筏下灘疾出塞怯橫行還家顧深積相

傳即墨下復道聊城急偉哉齊大夫清節故無匹

聞吳侯去疾重理快閣賦柬

江閣竦巍構崇墉蔭長堤地靈侈南紀文采麗東曦白
龍卧積水金魚揚素鬚流霞粲成綺列翠遠以夷景適
意先快賞同趣未稀古人忽已往名彥復在茲取材度
層棟疊石壘重基翬飛出天半虎眎臨水湄政通士和
附惠洽民恬嬉優優如練句磊磊落木辭一美信難越
千秋恒若斯眷言載筆侍永懷求友思孤遊限羈旅跬

步惜睽違翹首詎能即撫心安可希

和答克呼景充宋文野謝子玉歐陽復初連偉

度五君見寄詩

徵君廣平後高節陵首陽文星歛奇耀古劍埋寒光陰
求金玉人適此逍遙場雖云貧非病肯以圓斲方雅歌
樂豐芭戎事藏中璋舞雩伊川春願列弟子行廬陵文
章家千古聲巍昂敢嚮座無羶但喜書滿床琅琅尊蠹
古落落科斗章渠成亦秦利坐君鄒魯堂柳營賢主人

薰沐道德鄉遐追白鹿迹近襲滄洲芳蘭蕙紉雜佩芝
荷製衣裳非公無此客冠蓋相頡頏白首連將軍葵莊
樂迷藏坐令矍鑠翁負暄朝倚牆揮毫氣凌雲橫槩心
未忘期君蟠桃實酌我流霞觴謝公養疴卧高風何激
揚妙語不肯吐縮手猶未遑含光世已驚懷璧古所傷
固應夢春草卧看蝸書梁長懷詠五君倦筆愧三長山
王一時數竹林非杳茫相從能幾何回首海生桑詎知
龜九頭敢附驥一驥五年身百憂我觴如沸湯賴茲金

石盟不改松栢香

冬至日子思容侍郎座上分韻得初字

官閒睡正美簷鵲時起予豈其得氣先而聲和且都覺
來一室中靜見天地初帝鄉豈不戀歲晚思吾廬昔年
拜家慶共此一日娛忽忽三十載窮愁生白鬚營營聲
利場擾擾冠蓋區顧惟枯槁姿迺與二妙俱矯矯漢廷
尉妙語傾驪珠翩翩金閨彥清言響瓊琚邂逅一樽酒
嘉穀雜山蔬焚香閱畫永添線良不如懽餘動歸思目

送南飛鳬家貧願歲豐黃祿朝可書

題松澗

亭亭石上松下有潺湲水清聲雜遠響坐聽醒心耳時
逢蘇耽鶴或見琴高鯉我欲往從之蒼蒼烟霧起

榆次驛

古道明草花峭壁竄蒼鼠山迴榆次口堠指并州路野
人習阻險高下藝禾黍泓澄澗流斷錦石燦可數豈無
登臨興信美吾非土緬懷全晉時表裏金湯固戰國既

鼎分形勝各盤據霸氣一消滅城郭非復故問樵樵不
知問牧牧無語立馬望長安蒼蒼歸鳥去

雨後同廖以善廣文看山

杪春意不憚攬轡登高邱山雨夜來過繞城空翠流爛
然雲錦屏遐眺不可周蒼蒼龍虎氣上拍天際浮美人
共佇立指顧復遲留金精峙東境雩嶺接西頭周遭亘
長陸迢遞俯平疇層層桃李樹嘉木枝相樛余方滯霸
旅眷眷懷舊遊還當凌絕頂歷覽大九州

滴水崖

高崖何亭亭有泉出品竇下為珠貫繩滴石石欲透跳
波注巨壑鏘若琴筑奏遠響驚魚龍清音雜猿狖陰連
棧道滑冷逼山木瘦停驂酌甘潔三嚙不敢漱詩成若
為書峭壁苔蘚厚

菊隱

粲粲石上花泠泠谷中水豈惟制顏齡亦以佩君子釀
酒既甘烈供蔬復芳美仙源不可到望望白雲起

鄒吉泰拉諸公遊珠林訪子高進士予以事牽
賦以為後會張本

公子好吟咏名山多往來昨聞珠林去賓客盛英才沙
磧逆灘轉浪花迎棹開林中肅飛蓋日夕具尊壘載歌
伐木詠逸興何悠哉俯仰兵革際幾人同此盃探題憇
禪刹乘月坐莓苔相如偶未至豈失後命催託此大雅
音歌之向鄒枚江山若有待別日共徘徊

次韻答仲修感懷

士生汨流俗浮雲蔽朝陽洗心淨氛埃孤月懸清光蟬
蛻聲利區豹隱道德場不著虞卿書但寫陸氏方迺悟
玉不琢孰為珪與璋又知純璞殘始備犧尊行虛舟任
縱橫桔槔謝低昂神遊狎鷗海意得夢蝶床載歌秋水
篇亂以逍遙章自愧聞道晚敢云或升堂惜哉山水窟
信美非吾鄉誰能見河清誰云采蘭芳是身雖臭腐寧
堪擅軒裳俯愧鱗淵沉仰慚翼雲頽欲辭簡書畏深入
林泉藏詰曲厭機穽卑陋懼嵒墻何時縱壑魚江湖永

相忘不學避風鳥深曠魯門觴白頭何醜悍越女何蛾
揚馬何了得失欲訊吾未遑鵬何了淹速作賦私自傷
檣櫓何散材松柏何棟梁鵬鷃何高低鳬鶴何短長我
欲問大鈞大鈞何蒼茫誰云廣陵散同調陌上桑誰歟
挽跛鱉擬逐蛟龍驤澆君談天口試我門冬湯不如兩
忘言宴坐凝清香

紫霞滄洲

晴波漾金沙雲錦若可卷剥啄者誰子驚鷗去人遠豈

無芙蓉製奈此秋日晚借問垂竿翁仙源路深淺

野田花戲答友人

陂水淨以淥原田美而遐盈盈田中苗的的原上花秀
若元圃雲粲如赤城霞誰令貴反賤惻惻行路嗟綠草
被沃壤繁花翳塵沙昨隨南畝田今入西隣家輝輝間
陵道莽莽接水涯且復事固蒂寧聞勸燒畬飛飛媚黃
蝶聒聒鬧青蛙無如野田好請子問蓬麻

抱疾二首

抱疾久在告閉門徑生苔孤鶴向我立修翎舞氍毹雪
毛落竹間翠光照玫瑰汲井煮仙藥鬱懷為之開安得
體順適百歲平無乖

久病事藥餌體中未和平出戶步履苦候問勞友生茲
晨秋氣高褰裳下堦行行少即據床坐聽飛鳥鳴少小
學讀書老大轉無成逢時愧苟祿覩顏竊文名每遇有
志士瑟縮如吞聲龔生後來者胸臆涵六經蓋世少知
已三十無官榮

門有車馬客

門有車馬客請賦從軍行將軍素英武鐵騎守長城玉
匣魚腸劍光芒掣飛電走馬沙場中才堪百餘戰承恩
歛徵起所願解重圍寸心逐黃屋殺氣如雲飛

望中條山

黃流不可渡驅馬歸桃林遙遙中條山秀色橫古今隱
者今何之試用物色尋應歌紫芝曲閒卧白雲深笑我
與時乖感我違素心不知山中趣強作山中吟

仙人山

林陰護宿雨，棧道泥潦積。凌兢馬蹄滑，使我心寒慄。東
登朝天嶺，奇險無與敵。迴觀仙人崑，相去不盈尺。驚風
低長林，颺颺衆崖壁。絕壑響奔湍，懸藤絡崩石。十年住
京華，學館多暇逸。我行非王事，斯地何以適。澗底燦金
沙，分明虎行跡。山深日易昏，驛吏勸行疾。

哀三良

三良昔殉葬，死有千載名。康公徇戎俗，迫以亂命行。作

備且無後傷生焉得仁翹翹子車氏卓卓秦之英如何
同日逝兄弟無一人殉死不殉道元宗義為輕所以仰
天嘆悲哉黃鳥鳴曹公狎忠義王子失權衡自餘效顰
者瑣瑣不足陳先賢有名訓忠則良可珍

哀嚴陵生文炳

久客遂長往至友罕儔匹焉知天地寬罹此羅網密畏
塗窘高步遐筭屈短日誰為石與阱而謂膠在漆喪亂
總弗支紛紜竟何益蛩悲咽吟榭芸敗滿書帙呼之不

聞聲握之不能即謾堂樹忘憂蘭砌蘊兼壁觀此增惋
傷哀哀淚填臆

次韻陳希道和答鄙句

遙遙黃泥坡望望清伊陽落落我與君共此明月光平
生農馬智謾說古戰場坐令籀雲駒長鳴思九方我懷
愧涇渭君才自珪璋回頭蔡克兒亦在交游行新詩妙
五字家法窺子昂過我蝸牛廬坐君獅子床雞出了得
失虎豹炳文章高懷自竹樓清夢猶雪堂願從玉局僊

騎鯨白雲鄉下視笑湘纍採擷紉衆芳憐我失收身紫
鳳倒短裳胡不接羣飛羽翰同頡頏試看春蠶巧作蠶
思自藏又看老狐黠安居穴垣墻那知鼎鑊憂不與俎
豆忘且當置許事萬慮付一觴北斗不挹酒南箕空簸
揚虛名一畫餅癡兒日遑遑炙香不足喜棄捐亦奚傷
長吟感興篇仰眠看屋梁妍媸果誰分尺寸果誰長人
定能勝天胥言非渺茫君家太邱翁晦行如瘦桑紀堪
與羣泰十輩爭騰驤持此欲壽君春醪若為湯會看虞

賓後汗簡垂馨香

橫翠堂

天宇浮修眉木末堆髻鬟遠煙雜嵐翠政爾明滅間拄笏者誰子目送飛鴻還

楊宗魯行義詩

關中有一士行義舉國推昔在垂髫年挾策不勒師慈親已鶴髮兄弟相怡怡嗟哉董邵南名與淮水馳鄉閭表君子王烈相與期辟書來興元結束告庭闈豈無毛

義喜水蘂以自持
皇皇綉衣使如獲
壁與珪羅置鴈鷺
行條理皆得宜
擊彊如摧枯
趙蓋相攀追
平反共一笑
我慕雋不疑
錦江與南詔
稱譽均一辭
天歷盜弄兵
盟歆起滇池
殺吏火官寺
奔潰勢莫支
微服竄巖谷
草木充朝飢
蠶足報蜀省
鵠立忘其疲
我欲進短策
無由至丹墀
指陳利害端
了如鑑中窺
隱隱巴道路
悠悠漢旌旗
坐令萬黔首
危脫劍頭炊
遷擢薇垣曹
訐謨佐龍夔
見待以異禮
翻然忽言歸
包胥泣秦庭
忠憤知者誰
魯

連不言功耿耿空自奇未幾丁父憂泣血雜涕泫喪祭
尊禮經觀者無瑕疵是年歲大祲關陝多死饑宗族二
十喪馬鬣高義魏施恩及里閭義塚何纍纍腴田均四
弟耕耨俾以時蔬圃聊自給抱甕甘胼胝緬懷申屠蟠
高節有光輝又嗟晉王裒竟廢蓼莪詩蒼天不虛應禍
福各有隨馴烏祭墓前甘露零松枝豈惟淳風還坐使
薄俗移我詩非為君為世陳良規

發赤城

赤城夜來雨新漲
沒馬膝曉行鶴門嶺
鹹鹹亂峯碧秋
高川原潤禾黍紛已積
居人望翠華父老扶杖立牛羊
散在野晴曦漏雲隙
崖巔掛虹霓草際鳴螻蝈
既忻寵光被復協栖遁迹
行行幽興得覓句寫崖壁
佇立望蒼茫亂飛歸鳥急

同劉文原仙客坐瑞芝亭

稅駕息元圃塵思積
盈襟朋遊適良晤冠蓋同幽尋
花發洞門杳鳥鳴修竹深
遐觀達萬變內顧惜分陰
余懷

抱耿耿流運逝駸駸俛仰一時好悲哉葵藿心

壽萱堂二首

階前萱草綠屋上慈烏飛慈烏啼朝陽萱草含春暉香
浮尊中酒綵製膝下衣持壽鶴髮親年年樂無違
萱草生堂階慈烏不遠飛吐花解忘憂返哺鳴相依豈
惟擇地生而亦知所歸何以守此心所保終不違

題聽雪軒

論文憶李白對酒懷謝眺如何竹牕友獨夢寒江釣明

發望鍾山千峯玉相照

嘉樹軒為胡士則賦

南山有佳木濯濯皆十圍
瑞露沐柯葉朝陽借光輝
女蘿既有託好鳥亦有依
青青與冥冥所保終不違
不違復不斲美玉終在璞
所期歲云晏刻作雲門樂

九月十一日鄰寇逼境倉皇南渡感賦

鄰邑舉烽燧長驅寇南平
中宵始聞警挈家遂遠行
倉皇具舟楫所志惟弟兄
初營暫涉水將謂復還城
歸途

逼烟燄戎馬亂縱橫父子兩隔絕慘哉生別情慈親力
疾起負掖同遐征飢分路人食渴飲田婦羹兒童不遑
息蹢躅昧前程為謀若不早臨難乃無營前事杳難測
逢人空涕零存亡有至理瞬息且偷生

放鶴亭

白鶴招不來青天飛片雲應隨紫鸞車往見三茅君雲
上僊風過空香萬里聞

覽古

楚國憤奇士伍奢真可憐
儉人費無忌讒間平王前
讒奢未及止思去二子賢
賢哉子胥智乃出無忌先
弟兄永訣別父子相棄捐
貫弓向中使去就何翩翩
吹簫道中飯脫劍江上船
艱關歷他境慷慨張空拳
公子不可說專諸能解懸
退畊伏中野決策如轉圜
二國適多釁五年方見宣
操兵遂入郢殺氣如霏煙
不得費少傅斬首謝厥愆
徒令楚舊主乃辱吏士鞭
報楚既得志謀越徒進言
屬鏹早受賜鴟革往不還
忠因怨毒發孝以忍

詬全樹檟志弗遂夫差隨上仙悲君讀遷史今古慨悠然

雲巢

巢居巢何許西山白雲是仙風過其上遠聞笙鶴至推
戶欲見之氤氲漫弱水舒可彌六合卷之膚寸耳聚散
了無跡吾心亦如此知風既有鵲知雨亦有蟻問君君
不言手揮白鸞尾

野鶴為述律存道賦

九臯有元鶴故巢遼海東常為仙人駕雲上乘剛風云
胡白鴈來城在人民空獨立振玉羽心馳寥廓中只令
覽德輝下與威鳳同宵警金莖露夕棲瑤樹叢回頭視
雞鶩啄粟坐樊籠

進學齋

昔我種嘉樹于彼南山岑風霜偃薄餘雨露灌溉深既
脫斧斤戕復無牛羊侵寒暑相代謝萌蘖而十尋材可
梁建章陰亦成鄧林青黃或犧尊窈妙揚瑟瑟翩翩媚

學子斯言可為箴

欽定四庫全書

伊濱集卷三

元 王沂 撰

五言古詩

內白齋

動息祛百慮紛華謝羣妍靜專外始定敬直內乃專悠
悠天光發皎皎冰鑑懸反照但一室流輝昭八埏歛舒
豈徒爾恒久貴自然如何蚩蚩者敢昧蒼蒼天紛持白
黑辨而契內外篇荒蹊感所入焉能探其元永懷保貞

素橘頌乃陳言

伊闕道中鞍馬間得詩二首

夕陽明遠村
槁葉索索雨
遊子隨飛鴉
翩翩適何許
秋聲不可遏
歸意不可禦
橐橐結欲栖
場甘辛早登俎
偶諧田園娛
益見風塵苦
遥遥伊闕道
馬跡幾來去
客愁日以新
山貌日以古
持此誰與言
數徧道傍樹

道逢臺笠叟
嘆息東臯曲
云有一頃豆
雨荒秋草綠
敢辭荷鋤倦
但恐豆苗沒
感之在無言
相看淚相續

賦得攜手共行樂別嚴元

攜手共行樂臨別重懽宴落日照離尊流雲駐歌扇折
柳君不聞采蓮人共見離懷不自適去意苦難變望望
澄江濱危檣語雙燕

贈羅仲矩重之金陵

大明麗中天萬物罔臨照哲人感休運鼎鼎列清要都
俞備八凱敷歷聯二妙亦有希世材幡然起屠釣誰同
不賓者而敢犯譏誚濟濟鴛鴦行明明鳳凰詔文華擢

上列機警越常調之子英俊年趨風昔長嘯筮仕司東
湖寧親望南嶠雖成閒居賦豈免宣室召依依去南平
杳杳向西笑要途諒特達下邑被榮耀殊勛倘可策于
以答廊廟

有感

馮婦昔一申猛虎知善搏宋均美政化境內虎先却周
處變所脩白額首擒縛李廣莫夜歸彎弓射叢薄當其
肆害時風生動寥廓四人異時起意氣撼山嶽操行雖

不同天下稱去惡兵餘二三載虎跡宛如昨咆哮據當
路白晝伺人攫南鄰魂未招西舍慘不樂耽耽莫之避
墟里困蕭索何代無奇材古道仍不作

題胡濟川嵇康牀琴圖

先生家何在昔住稽山陰方牀日讌息上有焦桐琴流
目視宇宙何人知此心奇才軼同列幽思積盈襟絕交
書固偉養性論亦深誰讒卧龍質反使禍見侵寥寥廣
陵散百世寧知音惜哉畫史輩不識孫登箴

留題玄妙宮

仙家擁修竹境勝欣小停玉殿斷香白石門古苔青松
月淡蒼蒼風泉遠泠泠清夢仍丹邱晏坐存廣庭予以
淨塵慮予以朝百靈予以賦遠遊予以新宮銘

寓吉安林塘避桃林兵警感賦六首

汎舟水東偏擇地林塘口稍紓兵革難少待旬日久時
時候邊警佇立屢回首路逢荷蕢徒坐石蔭高柳及時
事畊鑿煩慮復何有不聞桃林戰昨日竄羣醜泰運未

有期淒涼在郊藪

秧田既已插麥壟亦已翻林園富桑棗沼沚具蘋蘩朝
畊暮還息啞啞相笑言昔聞異人說物外有桃源不到
武陵境安知人世喧

霧歛衆峰碧日暄羣木蒼翛然南軒內媚此春晝長手
攜鉅編讀塵境悉已忘池魚迭遊泳野鳥紛迴翔物性
各有適營營奚所望

樹棗易為業畜萍易為魚家家重生產園沼富贏餘為

農乃自適為士當如何賢聖去我遠躬畊還舊廬

牧兒采樵歌歌起山谷應中懷詎有思出口但求勝雅
頌世莫聞鄭衛人皆競睠茲音節美俯仰足清聽

白鷺下平田平田綠秧美低徊獨拳立庵忽雙飛起周
原風日好遠客亦戾止三茅三家邨煙塵不曾已人生
本萍梗流寓隨所以

恒齋

學道貴有恒為善亦如此一毫無間斷迴若天淵比柳

也河東良藝德傳父子槐陰蔭千畝河潤連九里是心
擴充之奚止一鄉已昔聞陶唐風今見陶唐理

題劉憲副為蕭鵬舉寫雨竹圖

風雨川上至秋聲滿喬林初疑鳳鸞引忽若蛟龍吟洋
洋飛動意矯矯變化心隱晦在一壑千霄故千尋美人
隔秋水環珮鏘璆琳清嫩毓內美孤高蕃遠陰以茲石
上操託爾邱中琴共保歲寒節永言懷好音

題屈原漁父圖

屈原水之仙妙在遠遊賦飡霞飲沆瀣所述非虛語孰
云羹魚腹聊以辭漁父眷眷鄉國心靳尚終莫悟沅湘
流不極鼓枻竟何處日暮悲風多蕭蕭滿楓樹

出城南餞羅與敬東歸

並出城南門相送河南渡公家有嚴程况此春欲暮伐
木下遼岑拏舟邁前路冥鴻去已盡元鳥鳴相顧關山
路遙遙春樹隔煙霧遊子久不歸淒然望鄉故田園長
荊棘狐兔守墳墓謬為時所稽焉敢失故步慨念平生

親分携重相訴浮唐紫芝老東里喬木蠹歸歟倘先理
秋至或良晤

題李溉之白雲半間亭

焚香坐清晝一室遺垢氛無人與爭長只許白雲分白
雲本無心遇旱或成雨膚寸已有餘半間那用許

暮春有懷

我行長伊濱休日聊遊豫溪山足真味心跡捐外慕曰
余弛負擔徒以鄉曲譽敢云陋微官而不事民務度密

意少懽人家隔煙霧髣髴雞犬鳴林深不知處川華草
際浮空翠篁端吐挾晴花氣驕渴雨荻芽怒蒼然感物
情政爾濟勝具陟阜引瑤花涉江擷蘭杜美人遊不歸
持此欲誰與誰與慰睽攜山川脩且阻誰與敦佳期長
吟碧雲暮

還家

春日遞層陰鳥鳴池上林久行忽顧返佇立懷好音幽
花色相眩茂草翠交侵去日春尚淺歸來春已深親知

各分散陟彼南山岑
携持尊中酒誰與同
獻斟亂離苦役役涕
淚沾衣襟

悼兒

嬌兒名阿高皎皎玉
雪質頭圓眉宇秀雙
目如點漆憶昨湯餅
客譽兒美無匹鷹雛
精爽緊驥子神氣逸
誰云歲兩周熟玩而
驟失吾家世業儒潛
德久已積光大我門
閭望汝與諸姪如人有
十指孰啮孰可惜華
屋春暄妍朋戲相扶
掖憑几檢書冊挽衣
覓梨栗低頭解拜客

唾手學濡筆吾年已四十事未見一獲勤苦鉛槧餘賴
渠將過日念汝來京師襁抱恃母力遙遙三千里拏響
連車迹風雪之所饕負汝諒吾責坐令昨日懽今日不
再覲杳然望東南庭草為誰碧我羨拾巢鴉風枝戢修
翮又羨舐犢牛濡濕煦毛澤乳母抱出門文葆空卧席
交朋走相問欲語氣先咽神理本冥冥先儒言不得我
欲訴天關靈鳳先墜翼懼老為獨夫念之若芒刺或謂
妄當遣靜思益難釋嬰孩無哭儀禮經有遺則奈何恩

奪義苦淚滿眼黑終當護汝歸藏汝乃祖側琢我哭子
詩銘之壙中石

有持靈龜貺予賦此以謝

王子雅好卜漁人致靈龜服氣可千歲昔以釣得之置
之几格間顧盼生光輝答辭謝漁人龜靈爾何知兆以
休咎著用由鑽灼施枯虛乃物化千歲亦奚為曳尾生
可貴留骨死更奇玆藏襲巾笥將啟決狐疑神武而不
殺聖者乃如斯至人善觀化脫殼伏朶頤神知倘相契

試以此道推

題雲林圖

浮雲如游塵，倏起蔽白日。何如茲山中，聚散了無迹。豈無學仙子，只許猿鳥識。結巢青松頂，掃葉煮白石。

送玉峯長老四首

俗士如磨牛，欲去鼻已穿。豈知世外人，來往雲飄然。玉峯叢林秀，眼碧眉幾煙。

不作贊公色，早叅雲門禪。是身無建立，捨策因衆緣。築

垣聽魑魅施食來烏鳶

出家英特事脫屣弊惡纏把茅折脚鐺可過三十年我
本積精練夙記維摩篇

中間一念差坐受衆目憐稽首西方仙可念未可捐借
師卓錫泉湔我綺語愆

題龍氏樂善堂

余愛淵明詩匪善奚以敦誰云甘泉谷中有至樂存龍
氏世簪組磊落多璵璠築堂種嘉木叢陰庇其根惡禽

不敢棲好鳥時飛翻清琴橫我床濁酒盈我尊願言懷
靜者時復扣衡門

題胡士則善餘堂

為善古云樂孰計慶有餘譬彼種嘉木歲晚陰扶疎宦
者矜巧智農者爭膏腴銳以身易物作計良區區番陽
有遺老築室愜所圖蒼蒼華藻峯鬱鬱杉松株兄弟相
埶荒兒孫亦詩書豈惟澤其家而亦浹里閭因之謝林
壑吾欲卜鄰居

宿濱民家

晨發伊山陽暮休清汝湄
二三田舍翁勞我鞍馬疲
秋高天雨霜刈獲此其時
所從吏卒多溷汝父老為
我來佐山邑三年何所施
相看愧竊食頽汗難為辭
夜闌接軟語青燈耿茅茨
願同南溪社敢望桐鄉祠

隱賦贈胡道翁

避地如避世入山思最深
營營許史輩孰是巢由心
落落石間而多松桂林結
宇甯容膝攬秀豁開襟娟

青蘿逕粲粲綠綺琴一彈箕子操再鼓重華音張目視
八極矢心發孤吟落日小山桂清風首陽岑新歌發延
瀨過耳何駸駸鳳吹聞洛浦遺響入雲沉自餘嗜接武
焉得齒諸任慨茲芝蘭契重接粉榆陰少日志萬里揚
名綴纓簪暮齡事一壑貴德比璆琳山居可相屬屢隱
渺難尋俛仰各遂志浮沉良足箴申歌示相好重比雙
南金

謁荆叔麟墓

蒼蒼登古原舉杯酌詩翁筆端千丈虹埋沒三尺封僵
蹇萬籜龍強項冰雪中詩翁不可見直節與之同

遊靈山尋沙監邑隱所

往日嘗馳驅方春乍游行行吟過隙駒去策尋山蹇梵
刹夙未名高僧迹初展猿枝積藤蔓獅石徧苔蘚攬秀
詠獨奇臨流思何淺逃禪得名宦避亂棄軒冕濤回百
川峻路畏九折險後發復遲回烟雲陟層巘

題遠洲春曉圖

溪流隔茅屋相去能幾許欲採幽谷蘭扁舟下春渚岸
花綴衣襟水鳥驚笑語偶然諧真賞山翠欲成雨

感春四首

離離園中花曖曖空中雲匆匆南流景悠悠百年身美
人遊不歸草色日以新朱絃斷白雲綺席凝芳塵魯門
墮戢翼河津曝窮鱗人生能幾何為樂當及辰已矣勿
復陳相思秋復春

佳人在空谷幽蘭春自綠靜觀聲利場陽焰奔渴鹿惟

有無心子抱琴媚幽獨揮絃送歸鴻一寄千里目

徘徊崆峒巔還顧望北邙邱墓何累累春風綠茫茫坐
令英雄人飲恨遙相望榮名安所之萬代同悲傷所以
廣成子乘雲去翱翔

樵隱同在山所以在則異昭昭孔明子遺語有深意清
風洒賁渾千載凜生氣黃鶴望不來白雲老天際

天心水面

渟泓常滿杯深靜若無力風起欲成文月來同一色飛

簷倒影動觸砌輕波湧疑有謫仙人騎鯨在亭側

新樂道中

朝馳新樂驛暮走邯鄲道野水囓荒墳偃禾雜秋草傳
云有飛電着物物皆槁坐令原野間勢若磕逢掃離離
逃亡屋板扉沒流潦豈無勸農吏但言禾黍好老農鎌
滯穗哀哀哭蒼昊

望南屏山同呂仲鉉仲實作

游目南屏山道遙稅塵鞅清谿亂流涉疊巘綠雲上輝

輝瀑泉落隱隱天籟響荒途理通塞虛室靜弘敞中有
食霞人長作御風想不乘緌嶺鶴還顧漁郎舫芝草甘
若飴雕胡大盈掌雖為顏齡駐亦忌流光往永懷山中
遊觀化歷清賞

七言古詩

看山抵玉笥山下遇雨不能歸淹留信宿偶成
長句

秦山幾千仞翠入蓬萊城城中望山色明暗分陰晴老

夫散策山前路為愛看雲不歸去仰看驚怪鷺飛來回
頭或見雲生處崦中孤起如炊煙乘風騰上蒼崖巔崖
巔宿雲喜迎接橫空一幅兜羅綿天風吹散銀千縷淡
處是煙濃是雨雲師拗怒不肯回露出峯頭尺來許一
雨三日溪水肥老夫欲歸不成歸雲師知我憐不樂故
出小謫相娛嬉老夫作詩一笑領舉袖收雲散空迴倚
松絕叫山下人仰看雲峯起山頂

賣馬吟

馮先生貧惟一劍我今雖貧猶一馬聊同起廢病顚駟
敢向人前索高價眉山太史作新年賣却老驄為酒錢
香山居士鬻欲絲始知鬻駱放楊枝我不學遊俠誇年
少臂蒼挾彈章臺道又不能雄豪如二生千金騷裏換
輕盈驥傳稱德雖云好終日芻粱未嘗飽不須戀廐動
哀鳴會見錦韉金絡腦家傳清與白千駟非所求要將
好消息寬我庭闈憂青鞋黃帽雖吾有可奈嘗從大夫
後明朝款段駕雞栖疾惡猶如朱伯厚

白泉歌

白泉之流白如雪白雪連峯幻銀闕浮邱仙子太華來
頭戴星冠手持節一過西岩數百年靈芝五色何鮮鮮
山中閱世已陳迹世上聞名不識仙浮雲鬱秀常五彩
碧落空歌久相待幾欲緣崖采茯苓長嘯臨風望滄海
海中遙挹安期生六鰲戴山休遠行風塵十載散空濶
宇宙再新開太平太平人物世希有我欲看山待重九
諸子重携綠綺琴三仙共酌黃花酒漁樵徑路草荒荒

回首煙霞接混茫
交游歛散塵緣重
節序空酬興味長
因招白泉雪更望
白泉嶺別日吹簫
駕鶴輶知是王喬
到仙境

寒食行次進士吳莘樂韻

百花冥濛媚初日
萬戶烟消記寒食
陌頭楊柳青搖搖
柳底佳人雙翠翹
春醪盈樽肉盈俎
淚落飄風濕新土
遠人無家望鄉拜
慟哭松根憶前代
磨牙豺虎亂交衢
縱有音書倩誰帶
可憐戰骨成邱墟
不獨若敖悲飯盂

白楊無根附春草作底英雄是中老杜鵑啼血獨魂斷
感此淒涼夜中飯明年寒食望關山滿路山花君早還

送祝平遠

江城四月風雨夕聞說河流高數尺故人官舫伴春歸
解印初辭浯溪驛顧我南園萬竹林卜居未遂忽分襟
曉山猶似來時好春水何如別意深別離苦多歡會少
把酒聽歌思深杳外郡掄材紫詔頻要途策足青雲繞
楊柳吹花媚錦衣滕王閣下弄晴暉懸知鼓棹東流去

故舊遙瞻彩鷁飛

戰城南餞友人從師西征

心惆悵望重城城之南屯甲兵背河赴敵星火急走馬
略陣煙雲生戰城南列飛將操戈矛脫弓韋生擒賊酋
馬上歸壯士鳴鞭兩相向中有一人冰雪顏遙隨主將
馳入關妖星如雨墮地殷殺氣上逐孤雲閒息民按節
勞險艱鐫功勒石磐龍山紫薇花開掖垣裏黃麻詔出
彤墀間城南班師君早還

濠梁小立同宋有庸賦

春城粉堞連營壘濠上東風發羣卉科斗元精細滿池
茨菇綠苗低出水別來容易見春歸聯旆行吟踏落暉
尋常百姓今誰在柳外年年雙燕飛


遊靈泉寺寺僧談其祖師善寬伏虎事求詩走
筆以贈

山深欲無路木杪浮紺宇靈泉引青竹聲亂落花雨至
人晏坐處戒刀伏龍虎馬駒獨何疑山鬼敢予侮我生

局促隨塵網每到寬閒聊偃仰但得螺螄吞大像會見
瀉山居百丈

畫眉池

趙宮昔日嬋娟子玉貌仙姿雪相似黛螺畫出遠山色
欲照清流嬌不起折釵玉燕塵半洗依稀尚見承恩字
荒池私蛙鳴鼓吹官柳莫妬蛾眉細



欽定四庫全書

集部

伊濱集卷

四至
六

詳校官庶吉士臣初喬齡

侍讀臣孫球覆勘

謄錄監生臣任溥

欽定四庫全書

伊濱集卷四

元王沂撰

七言古詩

陽春曲

楊花濛濛海波白十里香風飄紫陌
流蘇寶幃金陸離漢家帝子朝天歸
蒲萄重錦新勅賜蓬萊宮中綠衣使
道傍縮首觀且避蹀躞玉鞭光照地
大隄綠樹啼嬌鴉知是平陽公主家
回首畫橋芳草暮蝴蝶不隨春色去

楊花宛轉曲

妾乘碧油車郎乘青絲騎相逢狹斜道楊柳著花未遲
遲度紺幃稍稍逐蘭珮宛轉結深情歲華含密意游絲
絆得陽春暉乳燕銜將何處歸翡翠輕裾承不著寶環
纖手捧還飛合歡金縷結未已馬啼聲斷鳴珂里鳴珂
芳草綠離離楊花依舊逐游絲游絲掛在空虛裏莫道
春心無所似

杜翁八十歲

陽曲杜翁八十年雙瞳點漆眉紫烟鹿皮裁裘鳩刻杖
見者疑是商山仙問翁康強何以然年未五十嗜欲捐
養生有道不鍊鉛安心有法不坐禪清時壽域開無邊
承家有子才且賢諸孫亦復相後先斑衣竹馬來翩翩
長軒奧室羅芳鮮自適其適全其天更知守一歲且千
此語不信莊生傳

題竹溪

山家有田不種玉長林橫陳萬修竹紅塵千丈定不到

秀色一川差可掬
山人獨立清若鵠
時聽溪流響琴筑
宜無摩詰畫輞川
亦有昌黎序盤谷
林泉真樂自有餘
塵世虛名顧何足
他年拄杖我敲門
煮笋堆盤釀新熟

送蕭性淵縣尉

蕭郎本是將家子
部曲當年散如水
錦囊故物有焦尾
蕭也與之共生死
北上彈琴峽中道
寫出流泉言語好
龍沙萬里躍馬歸
青袍風吹白于草
江頭鴈落春蕪碧
小試腰間大鳴鐃
酒酣夢著塞垣事
雪擁穹廬深一尺

只今人物方渺然英豪誰識郭通泉袖中正有霜鐘摻
天上應傳寶劍篇

題郭熙山水

不知造化初此山誰開坼峯隱羣山深路盤兩岸窄始
信郭熙手力與造化敵巒溪淋漓潘谷墨妙處不減營
邱筆愁雲慘澹萬里凝陰壑闌干千丈氷杖筇荷擔者
誰子袖擁兩耳如寒蠅雪深芒屨迹易滅前溪渡頭鳥
飛絕人生胡為不自逸歲晚崎嶇行作客剡曲拏舟興

盡還灞橋騎驢肩聳山書生骨相例寒餓留得虛名傳
世間

襄城道中偶雪

黃雲壓野撥不開天寒日暮胡為來我前雪片大如手
我後槁木鳴相挨地爐圍處燒榾柮灰中笑指蹲鴟熟
田家自有老瓦盆不管北風寒刮骨金猊覆鞍雪不濕
三尺角弓鳴霹靂歸來馬上懸雙狼不管冰髭珠的皦
人生適意雖不同鵬鷁逍遙天地中不似襄城城下雪

一段清愁愁殺客

苦雪吟

東風獵獵奪花魄
陵轢陽和強飛雪
過時舞態自婆娑
入夜寒聲轉清絕
糝糊物象偶爾同
炫晃晨昏才一瞥
饑鶯失肉坐欲癡
驚犬穿籬吠如噎
君不見酒闌歌斷
五侯家春光融融
面生鱗瓦溝急霰
珠走盤海犀鎮幃
風不揭又不見擁
門三尺表安宅破
壁虛窓飛亂屑
豆稽灰紅明復滅
僵卧渾忘衾似鐵

題溪山風雨圖

今年西遊出寶鷄羣峰迎人高復低秦山森列古環玦
渭水摩蕩青玻瓈前林慘淡風雨急元氣淋漓收不得
淙流浩浩懸縞素山澗層層失紅碧回瞻縹緲烟霧中
飛樓峽榭如爭雄若非祈年索泉觀定是五柞長楊宮
猗飈掣蓋嗟行旅苔磴歌滑畏如鼠欲將筆力狀奇絕
只恐山靈驚妙語歸來京洛厭風塵開卷洒然醒我神
澄懷寂聽追所歷竟欲濯纓溪水津南朝君臣歌玉樹

畫工筆諫昏莫悟江風撥屋醉不知珍重山人詠漁父
為施淳民題臨本郭熙山水歌

崇寧一片郭熙山淪落人間感流轉毫分隱顯別清妍
千疊峰巒坐中見葱籠雲樹只重重世間春風幾度逢
怪石常存犇壑勢幽泉微露出山蹤緣奇挹勝茅亭小
亭下清江自縈繞諸峰斬絕出陂陀天矯蒼松立塵表
百尺絲綸一釣舟石闌斜對路悠悠山色自多朝暮趣
江流不盡古今愁郭家名筆誰摹寫鄒氏山房絕瀟灑

臨流點綴入精微意態神情豈其亞施君之筆良足稱
畫樓粉壁時相親長歌一曲丹青引莫道今人愧古人

送陳舜咨

北風吹雪山欲奔擁裘坐馬愁鳶蹲觸寒歷險來特特
杯酒談笑回春溫我方學道畏壘北晏坐已入不二門
築垣昔曾聽山鬼灑筆今解憎王孫丈夫事業抗浮雲
紛華剝落真實存長松老矣更添節甘井汲多終不渾
恨君不識謫仙人恨我不識岑徵君鳴皋山前一相見

詩愁又滿梅花村

雪後遊陸渾山宿鳴皋寺感事

窮山作吏聊隨世為愛伊濱可人意
田間野水弄明滅木末晚山橫紫翠
陸渾坡口天下稀閬州城南之所愧
折葦風生鴈雙起平沙雪淨鳬翁睡
我本江湖釣竿手漁子蘆人不須避
紫芝眉宇無復見持正文章誰得記
生前偶落山林牢身後不同金石碎
山川難得人更難勝槩名流今兩致
千載那知我亦來登高不墮羊公淚

身似轉蓬安稅駕事如嚼蠟都忘味長疑安石恐不免
何似孫郎遂初志日暮招提陳薄飯夜闌禪榻成良寐
不將妙語記曾遊只恐山靈厭人至

戲詠南山土風

羣山奔騰南相望萬馬同秣爭低昂危途中盤香一髮
俯視欲作寒蠅僵澗流初疑蒼兕吼烟起忽作青蛟翔
峽空僅容孤鶴度川衍或可千人藏桃源之山隔塵世
菊潭之泉多壽康茅茨日暮照空翠竹牖天寒搖水光

驅驢木杪販麻客挾矢林間圍獵郎地爐堆獸爇石炭
瓦鼎號蜩烹芸桑村醪未溫和鹿血餅餌半熟分熊肪
登高放目不可制長劍耿耿倚大荒大荒物皆得所託
我胡為乎獨遑遑膠膠擾擾浪自苦物外日月來不忙
伊靈馬我一片石他年刻此囚山章

大風

東君染花滿春國飛廉妬春奪花魄黃塵瀟瀟暗白日
天為花愁救不得大川揚波水柱立羣鴉驚呼半空黑

長紅小白一掃空
乞與游絲數千尺

秋風吟

征鴻歷歷明秋序
遠客翩翩適何許
馬頭黃葉落四五
回首青山欲飛舞
登高障袂望所思
思君不異瓊樹枝
江南王孫歸不歸
羅衣不奈西風吹

題青山白雲圖

青山偃蹇幾今古
時出白雲相媚嫵
崑紅澗綠紛變滅
川靄林霏雜吞吐
道人昔卧山中雲
歲晚去作人間雨

紫薇華發春晝閒思逐芝田鸞鶴侶

題醉客圖

生不願為鄭廣文亦不願學灌將軍斫頭何用知程李
擊節空歌有鬼神願從圖畫四君子日日杯中尋妙理
倒冠傲兀亦不惡奮袖低昂聊復爾美人行酒爾莫催
而我肯顧尚書期碧梧影倒黃金壘身世悠悠兩不知

玉印歌

茂陵石馬寒嘶風神光貫月如長虹偶同玉碗出人世

蟲篆螭盤能爾工將軍漢庭功第一至今姓名昭白日
摩娑欲刻三歎息人壽安得如金石

題牧馬圖

一馬色若霜前草逸氣欲無千里道一馬不受青絲掣
黑雲滿身四蹄雪二馬欲並意態閒石壺瀉水清潺湲
三馬同秣性各適齧聲洶若江聲寒就中一驄精爽緊
肉駿礪磊蒲萄錦龍媒豈獨照夜白赤驃青驪皆絕品
長髯奚官相顧語檢校羣牧新開府溫涼宜適調御工

早晚東封禪梁父蒺藜沙苑秋復春得見畫圖猶竦神
只今豈無騷衷與麒麟嗚呼空老鴛鴦羣

題真妃玉笛圖

開元垂拱治無為朝退華清日晏時傳詔梨園停百戲
親調玉笛教真妃雲鬟綽約蛾眉小怙寵矜恩氣浮香
一曲清平樂府詞宛轉遺音動天表芍藥輕風拂御筵
無人催喚李龜年紫鳳低徊雙闕下綵雲繚繞百花前
當時行樂深宮秘萬歲千秋不相棄今日人間看畫圖

關河風雨鴈相呼

題張生蘭谷圖

山人昔隱溪一曲紫蘭猗猗滿幽谷山人今遊冠蓋場
不采而佩蘭何傷黃塵急流烏帽底故山朝朝白雲起
有時洗手對桐君坐覺秋芳清在指秋芳擬欲贈同心
日暮徘徊幽思深披圖武夷忽在眼擢歌激冽動長林
和賈參議題松風海月圖

道人墨瀉金壺汁老貌怒奮蒼髯吸坐令高堂之素壁

滿耳松聲水聲急龍宮採詩作步虛素娥起舞波神立
鈞天廣樂奏未終含毫欲下鮫綃濕

食筍

野人餉客無長物只辦行厨入脩竹眼明初識玉嬰兒
胷中會著貧簞谷我昔老禪同一龕玉版宗風曾飽參
首宿盤中重相見洛西風味如江南同谷饑寒杜少陵
五溪放逐高將軍山寒黃精不堪斮地暖野薺空如雲
我今流落心不動一笑聊呼麴生共果然口腹能累人

夜來忽作西湖夢

過古陵

古陵纍纍隱復見春草平鋪綠初遍高原日落風欲旋
金蠶自眠飛玉燕路人指是唐家陵石馬欲走牽寒藤
牧兒朝來掘夜鼠山鬼夜半偷漁燈道旁荒墳誰氏子
寒食年年來掛紙清渭東流未云已卻憐麥飯寒泉水

題山水圖

山邪雲邪低復高勢若鉅海翻波濤石林竇帳隱靈宇

石磴黃帽雲霜袍落花香澗引猿飲長松流風驚鶴夢
煙霞彷彿仇池山制度依約桃源洞鳴頭漲綠環亭臯
似聽鷄犬相鳴號畸人朝挂牛角帙釣叟暮移魚尾舸
不知世間有此境便欲歸耕田二頃青門學種故侯瓜
丹巘欲栽董仙杏三年博士冗不治壁水泠泠明鬢絲
塵埃老我薊門道山中日日生瑤草

茂陵

玉堦苔生履聲絕桂苑芳銷宮漏咽君王起望集仙臺

方士靈香海上來九華帳深蘭燭冷是邪非邪影非影
含毫抽思賦難工坐聽梧桐落金井茂陵松柏陰連空
蕭蕭石馬寒嘶風青禽消息天上斷玉輦歡遊泉下同
春草淒淒秋復歇金鳬影沉銀沼竭空餘海燕蒲萄鏡
夜夜神光射明月

過魯山別賈尹公溥

南陽之道何盤紆西風老樹鳴相呼魯山之神解娛客
松聲尚作于爲子行人十有八九癯女寬裁襟男潤領

驚聞老芋登客盤喜見紅薑供煮餅紫芝騎鯨去不返
琴臺蕭條白日晚小留我欲弔前賢為報吟鞭不須挽
玄巖石硯為柴舜元憲僉賦

漢江有奇石磊落太古色淘沙相薄蝕歲久露巖穴幸
免女媧手鍊之補天裂不逢卧龍公取補八陣缺江妃
水仙不敢惜夜夜黑雲蔽明月江頭繡衣使偶見喜且
驚繡衣昔草子雲經置之几案錫嘉名坐令書幌間縹
緲烟霧生願君結交如此石味如元酒與太羹

遊德亭宮訪真人周脩然故隱壬辰間兵動居
民多避地山間虎為害周拘囚之民遂安堵山
中有飲虎盆尚存

黑山之山天下雄高崖巨壁摩青空至人昔此巢雲松
獨立世外揚元風霧零暗山兵亂起錦服霜矛雜蜂蟻
丁男失耒女兒啼連邨頃刻無全理居民若有所見然
移家盡入桃花源誰知山祇大失職猛虎山前搏人食
吾師哀民祓不祥笑談約束如驅羊一朝仙去若雞犬

空有爪痕留石牀我因王事事幽討白雲猶封鍊丹竈
千秋鶴馭望不來天寒日暮山更好

贈答海都督

安西健兒速如鬼萬騎飲乾菊潭水羨君談笑淨妖氛
幕上啼鴉報空壘南陽老父如雲屯豐碑深刻昭奇勲
青史先書段太尉城都不數花將軍

過獨石廟

落星何年化為石羣峰不敢爭長雄蒼蘚鱗皴動古色

荒祠慘澹來陰風，鶴馭朝迴仙子駕。
鮫綃夜織馮夷宮，憑誰喚取昭華管。
吹入遠烟空翠中。

射鵬圖

元旌獵獵搖清秋，將軍醉擁烏貂裘。
雙飛點破暮天碧，彎弓欲射仍遲留。
奔星一發馬前墮，驚看玉爪黃金眸。
歸來快飲軟臂酒，呼鷹却笑劉荊州。

桃源圖

祖龍蕩覆蓬萊池，仙人不誦祈招詩。
武陵自有建德國，

桃花只恐秦皇知春風幾見花成實老幼熙熙不相失
人間安得盡花間環海一家歌帝力長溪錦浪翻晴空
丹崖翠壁烟濛濛正朔誰知晉朝厯衣冠尚有秦人風
重華杳杳瀟湘浦虎踞鯨喏天下主千秋無復問主人
青山盤盤自今古

赤壁圖

玉堂仙人雪堂客夜汎扁舟遊赤壁世人欲殺了不知
卧聽中流風月笛清都採詩鶴駕過江妃起舞襪凌波

向來哀樂真夢幻舉酒屬客君當歌千年曹瞞等螻蟻
一為周郎酹江水江水悠悠萬古流坡翁時復騎鯨遊

題風漪亭

風漪亭前何所有下蔭菰蒲上榆柳魚龍鼓瑟清夜聽
鸞鶴焚香來白晝吟詩往往逢木客拏艇時時過溪友
栽桃未用悲歲換種杏政須煩虎守烟嵐滃鬱沾几席
琴筑鏘鳴奏軒牖知魚濠上果何樂抱甕漢陰天所壽
何當郎山山下坐濯足清流搔白首

題草蟲圖

老蟾睥睨登月窟爬沙脚手軟無骨遊蜂官府亦偶耳
朝暮兩衙自倉卒小蝸之涎不滿殼升高胡為怒雙角
飛來胡蝶占春風彷彿莊生夢中樂牽牛欲飲河之潞
蝨斯子孫乃如許眼前萬物總生意我欲拋書為老圃

題畫馬圖

圉人攬衣行且顧驂騑掣韁痒摩樹長松歲晚褪龍鱗
種蘭當門思古語

洛士張起宗緱山陳公之甥也善畫馬過余求
詩書此以贈

遠遊翩翩何所適老鷹叫霜伊水白滿衣黃葉驢背客
袖有龍眠天馬筆君家汲直天下奇渥洼原本麒麟兒
歸掃緱山讀書舍九原韓幹非吾師

一百五日行

一百五日春晝遲伊濱人家烟火微相逢十九癭累累
見慣何曾羞掩衣東風吹草綠如洗舊墳新塚皆相似

牧兒驅羊下邱隴知有人家來裂紙紙錢那得到黃泉
老鴉結巢高樹顛死生常事夢一覺何用服藥求神仙
青衫司馬不須泣共藉梨花作寒食三家邨市醉爭席
兩鬢塵埃人不識

